

Bondia.

Ha'u-nia respeitu ba Diretór Rede Reabilitasaun ho Baze iha Komunidade – Timor-Leste (CBRN-TL), representante NGO Forum, diretór TLM-TL, no partisipantes no bainaka sira hotu.

Onra ida mai ha'u mai iha ne'e ohin iha apresentasaun relatóriu final CBRN-TL nia programa "Espande oportunidades no Kapasidade Lideransa ba Feto sira ho Defisiéncias iha Grupu Auto-Ajuda liuhusi Dezenvolvimentu Kapasidade." Programa ne'e implementa iha Dili no Covalima. Ha'u orgulhu hodi hatete katak Programa ida-ne'e finansia husi Embaixadora nia Fundu-Apoiu Kiik iha tinan 2019.

Liuhusi fundu refere, povu Amerikanu apoia CBRN-TL hodi alkansa feto sira ho defisiéncia no lepra liu 100 resin atu atinje objetivus tolu. Dahuluk, hodi dezenvolve sira-nia kapasidade. Daruak, fortalese sira-nia kapasidade lideransa. No datoluk maka hari'i sira-nia fiar-an atu participa ho efetivu iha foti-desizaun iha sira-nia Grupu Auto-Ajuda no comunidade sira.

Programa ne'e mós alkansa ema Timoroan 600 resin liuhusi programa sira rádio no televizaun nian.

Importante tebes atu feto sira ho defisiéncias no lepra participa ativamente iha prosesu foti-desizaun iha sira-nia comunidades. Sira-nia perspectivas no esperiéncias presiza inklui hodi hamosu comunidade ida ne'ebé nakloke no inkluzivu.

Iha loron 26 Jullu, Estados Unidos celebra loron aniversáriu da-30 Lei ba ema Amerikanu ho Defisiéncias. Lei Direitu Sivil importante ne'e bandu deskriminasaun bazeia ba defisiéncia no garante katak ema ho defisiéncias iha oportunidades hodi participa iha moris Amerikanu nian.

Aleinde ne'e, fulan ida-ne'e – Outubru – nu'udar Fulan Nasionál Sensibilizasaun kona-ba Empregu ba Ema ho Defisiénsia. No iha loron 3 fulan Dezembru, ita sei selebra Loron Internasionál ba Ema ho Defisiénsias.

Ha'u fahe eventus tolu ne'e ho ita-boot sira tanba ha'u hakarak ita-boot sira hatene katak ema defisiénsia sira-nia lian ema hotu rona daudaun. Lá'os deit iha Timor-Leste, lá'os deit iha Estados Unidos, maibé iha mundu tomak.

Iha nafatin sensibilizasaun kona-ba nesesidade ba comunidades no governu sira atu sai inkluzivu no responde ho efetivu ba sidadaun hotu-hotu ninia nesesidade sira. Ema ida husi Amérika nia ativista respeitadu liu kona-ba direitus ba ema ho defisiénsias, esplika hanesan ne'e: Ita presiza envolvimentu iha prosesu foti-desizaun atu nune'e **“Laiha buat ida kona-ba ita sein ita.”**

CNBRN-TL ninia programa dezempeña papel importante ne'e. Líder sira ne'ebé dezenvolve liuhusi grupu Auto-Ajuda, bele ona uza sira-nia papel hodi sai defensor ba ema ho defisiénsias nia direitus. Sira mós halo advokasia kona-ba prevensaun COVID-19, no partisipasaun ema sira ho defisiénsias no lepra iha dezenvolvimentu sira-nia sucos.

Maske ho pandemia COVID-19, CBRN-TL adopta no kontinua promove kauza husi feto sira ho defisiénsias no lepra. CBRN-TL alkansa ona ema Timoroan 600 resin liuhusi programa sira rádio no televizaun nian hodi hasae sensibilizasaun kona-ba defisiénsias no promove redusaun violénsia bazeia ba jéneru hasoru feto sira ho defisiénsias.

Hatene katak CBRN-TL no organizasaun sosiedade sivil sira seluk bele iha impaktu hanesan ne'e hodi mellora membru comunidade sira-nia moris liuhusi Embaixador Estados Unidos nia Fundu Apoiu Kiik, lori

dunik ksolok ba knaar hirak ami halo iha Embaixada Estados Unidos. Apoia direitus umanus, promove sosiedade sivil, no hari'i relasaun ema-ho-ema maka servisu importante hirak ne'ebé ami halo.

Embaixada Estados Unidos orgullu halo parseria ho Rede Reabilitasaun ho Baze iha Komunidade – Timor-Leste (CBRN-TL) hodi ajuda hadi'ak liután ema sira ho desifiências nia moris iha Timor-Leste.

Ikus liu, lori povu Amerikanu nia naran, ha'u hakarak kongratula CBRN-TL tanba kompleta ona ninia programa ho susesu.

Obrigada barak.